

摘藻堂四庫全書薈要

集部

欽定四庫全書薈要卷一萬四千六百十二

集部

傳家集卷四

宋 司馬光 撰

古詩三

都下秋懷呈勗之美

愚疎強從仕趣尚與時乖
竭來遊京邑榮願知誰諧
王國富英奇氣象標巖崖
雲鴻送雙目攀援路可階
秋風轉枯葉颯颯繞寒齋
出門無所之飛塵滿天街
夫君宦未達猶得稱吾儕
解衣換斗酒且盡平生懷

陪張龍圖南湖暑飲 六言

紅旆繁林却轉瓊筵就水重開荷香著衣不去竹色映
酒遙來

樓船潏灩輕浪鷗鷺繽紛滿天清歌久之未度畫梁塵
落芳筵

道傍田家

道傍田家翁媼俱垂白敗屋蕭條無壯息翁攜鋤索媼
携箕自向薄田收黍稷靜夜偷春避債家比明門外已

如麻筋疲力弊不入腹未議縣官租稅促

送李汝臣同年謫官蘄江主簿

得喪互循環古今昧終始百歲落其間僅與毫芒似所以達人心身外不復紀愁來若亂絲疏解當以理昔君關外來籍籍聲華起憑案一濡毫萬言俱落紙老生闕其文色若寒灰死閣筆不能下敢有疵瑕指或時抵卿相入門俱倒屣閣夫迎受謁不敢揚眸視解褐吏邊州長塗初進跬蛟龍得尺水雙鶻方嶷嶷西羌負德澤飛

銷聲邊鄙添兵十萬餘斗粟無支擬州郡走符檄縱橫
恣鞭箠閭閻浪愁苦卒食半糠粃上官知君才悉以儲
糧委開倉募平糴至者車連軌嚴明束吏手誘諭提民
耳留穀受金去若與同儕市弦朔未云周露積丘山比
曾無轉餉勞坐飽防秋士莫府上其功明詔深嘉美為
僚登九寺長人專百里聊用報勤劬未言窮任使何期
逢怨讐意外成瘡痂剌骨舞文法吹毛出瑕滓清霜五
月飛慘烈傷蘭芷鸞鳳失椅梧飄泊還荆枳聖朝方任

能大過尚收齒況於濟時具暫然遭詆訾寧因青蠅惡
遂取璵璠毀良工構明堂必不遺杞梓勉哉益自立
勿為窮衰止人生難豫期神理無終否庸知今日憂不
為後日喜吾道誠無虧塲坎安足耻關山迤邐長百劒
連天倚縈紆結危棧迥入雲星裏蜀國富嬉遊花繁春
酒旨莫作弔原文投之岷江水

春日書寄東郡諸同舍

滑臺古鎮揭高牙主人賢厚賓友嘉公庭退休射堂飲

水沈綠李浮甘瓜清言妙諭間詼謔笑語往反何喧譁

別來汎濫若浮梗塵愁俗累稠於麻提鞭俄

誤恐

蓋觸風

日慘澹滿眼飛埃沙朱門湛湛果深淺門外日擁千餘
車闔人未肯即通刺指彈手版景欲斜就令入見亦何
事氣象渺邈凌青霞圍碁角智賭勝負拙者理與功名
賒捨之歸入戶庭隘仰視青天如井蛙後檐數尺地荒
穢不翦欲令生薺花當春寂寂但如此意恐至外逢紛
華奈何勝友百餘里不可一見如天涯何時更共把卮

酒側身北望空洛嗟

秋日寄山中友人

昨夜聽秋風霜崖幾樹紅
心隨新鴈去宛至碧溪東
聖主搜漁釣林巖今已空
胡為執高節憔悴久山中

和之美舟行雜詩八首

舟中夜坐

風柳動蕭疎寒星浸寥落
中宵四寂然時有遊魚躍
汀沙落席帆岸柳縈單舸
小市遠微茫簇水初燈火

船行遇風

蔡水僅成波不若江湖濬誠無傾側憂纜弱終難進

野花

喧喧桃李蹊何妨笑幽草但願保天真徐共春風老

水鴨

襪縫出短蒲毳毼浴清水物忌太鮮明何妨染泥滓

魚鷹

翩然下林表不憚風湍惡得雋輒高飛為君羞擊搏

冒魚者

弱篠絳輕絲盡日寒溪側獲少近知無溪魚皆爾識

都門路

紅塵晝夜飛車馬古今迹獨憐道傍柳慘淡少顏色

和之美河洲四詩

冉冉河洲曉晴霞登木杪稍見水煙開孤舟天際小
杳杳河洲晚客行殊未返目隨林鳥還心共征鴻遠
寂寂河洲夜蘆花繞墟舍孤客久未眠窗燈落寒爈

漠漠河洲雨依稀辨村聚時哉鷗鳥羣凌亂爭鳴舞

又和夜雨宿村舍

積雨久未闕豈徒行客憂夜間屋中人嘆息悲田疇方
春播殖時種食皆外求鞭訶犯赤日酷烈慙羸牛草蕞
競禾長從人借鋤耰晨疇戴星起日闇未能休豈無一
時勤所覲歲有秋今茲昏墊災大埜成洪流直疑滄海
溢繭栗浮陵丘昔時百丈原汎汎皆挈舟喬木失端杪
饑鳥下無投黍稷沈黃泥圭合安可收嗟予乏技能無

以易糠粃販鬻固所昧敢託市井遊欲依盜賊羣懦不
閑戈矛已哉任天地無益徒為愁一身無死所況為妻
兒謀之美愛物者淒然涕霑裘一夫有不獲伊尹為深
羞何當富斯民比屋困倉稠惜哉祿秩卑此志終宜酬

送韓太祝

維歸許昌

賦得交字

王城名利窟冠蓋鬱相交夫君獨鳳舉影然去喧呶
水清可濯箕山高可巢反顧公相榮一芥浮堂坳
大呂重豈知輕斗筭蒼蒼氣象嚴萬木擁寒郊

闕

點

隈曲初旭染林梢去去善自將因聲訪衡茅

和興宗夜直聽雨

闕

茫凍雨來入夜勢增急縱橫挾春風飄灑相噴吸敗
窻端見欺遽有萬點入先生伏經編眼冷倍昏澁夜分
童僕倦跛倚厭久立燈火為溟濛詩書亦濡濕夫君儲
善價未售不悵悵物華迎霽新佳賞時將及困中秣幾
何營釀須汲汲

花庵詩寄邵堯夫

時任西京留臺廨舍東新開
小園無亭榭乃構木挿竹多

種醪醕寶相及牽牛扁豆諸蔓延之物使蒙
羃其上如棟宇之狀以為遊涉休息之所目

曰花
庵

洛陽四時常有花雨晴顏色秋更好誰能相與共此樂
坐對年華不知老

自然天物勝人為萬葉無風綠四垂猶恨簪紳未離俗
荷衣蕙帶始相宜

康定中予過洛橋南得詩兩句於今三十二年
矣再過其處足成一章

卷四
銅駝陌上桃花紅洛陽無處無春風重來羞見水中影
鬢毛蕭颯如秋蓬

寶鑑貽開叔

流塵集寶鑑塵昏鑑不昏纖泥落清水泥渾非水渾人
能辨二物相與自忘言二物不能辨悠悠何足論無為
捨其內逐外取煩冤

謝王道濟惠古詩古石器

緱氏古城裏好古王道濟作詩有古風讀書知古意朝

來遣僕夫遺我古石器結從天地初生自一拳際工倕
創規摹般輪施剗刷淪茗北窻下坐有羲皇思嗟予性
迂鄙齟齬居今世忝官污臺省曾無益時智退藏又濡
滯尚不離朝市闕地避煩暑頗與營窟類

新構西齋中
鑿地為室謂

之涼誠非古人比拜賜得無愧

題太原通判楊郎中

希元

新買水北園

洛陽名園不勝紀門巷相連如櫛齒脩竹長楊深徑迂
令人邑邑氣不舒愛君買園中橋北堂壓崖端跨空碧

滿川桃李皆目前近水遠山一朝得曾陪尊兄此高會
豁然如出樊籠外暫遊尚爾況久居勝氣清風日相對
易生畫筆世所珍麋猿滿壁皆逼真并州近胡沙塵惡
終更早來為主人

首夏呈諸鄰二章

首夏木陰薄清和自一時筍抽八九尺荷生三四枝新
服裁蟬翼舊扇拂蛛絲莎徑熱未劇晨昏來往宜

燼燼久旱天颯颯昨宵雨塵頭清過轍水脉生新渚宜

徒滋杞菊亦可望禾黍勿笑盤蔬陋時來一觴舉

酬王安之謝藥栽二章

洛人栽花不栽藥吾屬好尚何其偏服之雖能已百疾
愛閑成癖無由痊

護根帶土我親移荷鋤汲泉君自種悅目寧將惡草殊
扶危或比魚金重

雨中過王安之所居不謁以詩寄之

萬木含涼雨驅馬有餘清長街帶短蕪舊潦駢新萍高

齋彼誰居雅尚推名卿汙亭雖地卑躡屐未妨行野服
踞藜牀蕭散臨前楹纂纂棗林繁欣欣藥畹榮過門不
敢叩自視慙冠纓素與安之約不以公服相過

送藥栽與王安之

盛夏移藥栽及雨方可種為君著屐取呼童執傘送到
時雲已開枝軟葉猶重夕陽宜屢澆又須煩抱甕

張明叔兄弟雨中見過弄水軒投壺賭酒薄暮
而散詰朝以詩謝之

喜君午際來涼雨正紛泊呼奴掃南軒壺席謹量度軒

前紅薇開壺下鳴泉落

虎爪泉上覆之以板每投壺板上設榻繞之榻去壺各二矢半

必爭如五射有禮異六博求全怯垂成倒置畏反躍

新格

倒中者壺中之算盡廢之

雖無百驍巧且有一笑樂交飛觥酒滿強

進盤餐薄苟非興趣同珍殽徒綺錯

小雨

雲日互出沒數朝飛雨清瞳矐似欲止廉纖還未晴映
空輕絲亂著物細珠明葉端危未落荷心重忽傾喜涼

高鶯舞便濕羣蛙鳴於予亦有得藥畹胡麻生

園中書事二絕

芳洲晚日鮮曲岸新雨好紅薇點圓荷金盞出幽草
坐嗅白蓮藥卧看青竹枝閑齋不成寐起讀聖俞詩

送劉仲通知涇州

四載一相逢相逢遽為別儕輩日蕭條與君俱白髮
酒不暇執舊遊那復說忽忽無他言暑行戒饑渴

和宋復古大雨

積陰連日作鬱蒸長雲飛天勢如鵬白雨四注垂萬絙
坐間斗寒衣可增

雷公推車電施鞭飛騰九澤舞百川須臾開晴萬物鮮
仰視白日當青天

見山臺晝卧偶成

移牀獨上高臺卧颯颯涼風吹面過林蟬忽噪驚薄夢
手執殘書幅巾墮

修醪醕架

貧家不辦構堅木縛竹立架擎醪醕風搖雨漬不耐
久未及三載俱離披往來遂復廢此徑舉頭礙冠行絰
衣呼奴改作豈得已抽新換故拆四籬來春席地還可
飲日色不到香風吹

螢

林塘荒濕地向夕已飛螢月沒蛩吟砌露涼人在庭隨
風疑落燼過水亂踈星學子燈前寢誰將爾照經

張明叔家瑞蓮

君家得蓮種遠自浙江湄
明燭然深盃濃朱畫細絲
盛開尤菡萏到落不離披
豈獨夏花好仍兼秋實奇
味長包石蜜殼嫩剥燕脂
况復芬芳久霜前殊未衰

蓮房

蓮房前後熟供噉不須齊
肉嫩山蜂子稜深天馬蹄
尚連餘蕊在深映亂荷低
脆美知新采近根猶帶泥

不寐

長年睡益少氣耗非神清
昨朝多啜茶况以思慮并
中

煩枕屢移展轉何時明
蘇秦六國印力取鴻毛輕
白圭萬金產運智立可營
如何五更夢百方終不成

苦雨

今春憂亢陽引領望雲族
首夏忽滂沱意為蒼生福
自爾無虛日高原亦霑足
連年困饑饉此際庶和熟
如何涉秋序沈陰仍慘黷
長簷瀉潺湲晝夜浩相續
喧湑流潦怒突兀壞垣禿
駕牛泥沒鼻跨馬水平腹
瓦歌松漫白道廢草濃綠
污萊閔下田漏濕憐破屋
縱橫委地麻

狼籍卧隴穀怯聞饑嬰啼愁聽寡婦哭閑官雖無責飽
食愧有祿世紛久去心物役奈經目鬱陶聊秉筆狂簡
已盈幅

八月十五日夜南園懷王君貺

昔公在洛師未嘗弃嘉節今宵秋半分空羨西園月天
色湛澄清風聲冷騷屑笑言不可親引領望金闕賴有
篋中詩端居數披閱

八月十六日過天街懷范景仁

秋潦收四野晴雲無一班忽驚龍門缺遠見鳴皋山涼
飈入毛髮顥氣清心顏悠然念吾友逍遙城闕間思陪
籃輿尾共此登臨閑

宿南園

頃來興味少旬日不為詩昏昏但思眠疲病知吾衰豈
無籬邊菊不欲拈酒卮絡緯爾何苦終夕鳴聲悲

九月十一日夜雨宿南園韓東國寄酒兼見招
以詩謝之

雨多秋草盛濃綠擁寒階吾廬奧且曲退縮如晴蝸小園
已自隘欲往泥濡鞋體羸畏風冷室處門常闔

空蝸切

九

日古所重負此時節佳緬想使君宴綺席臨高齋肥羜
堆玉盤飛觴酒如淮楚舞陵湖波茱萸落金釵神醒鼓
吹喧百疊疑傾崖歡餘忽我思牙兵星火差湫泉恥獨
醉醇味相與偕我飲雖不多和氣浩無涯梧子拾為果
拒霜伐為柴沼中數寸魚烹煎足為鮭

吳人謂魚肉為鮭

誰言

無以侑繞渚多鳴蛙交道久衰薄歸然見吾儕奈何數

舍遥晤語積年乖况乃辱嘉招私心豈不懷輾轅石道
澁重以陰雲埋雖有果下馬款段非渥洼臨風徒竦踊
志願焉能諧狂詩寄一笑聊用當詼俳

古墳

茫茫野田平極目厯厯古墳如夏屋碑板無文荆棘深
石獸沈淪松柏禿問人雖不知姓名昔皆高官仍厚祿
子孫流落何所之凶吉當年非不卜我來正值寒食天
祭膳不設無人哭

酬趙少卿

丙字南正

藥園見贈

鄙性苦迂僻有園名獨樂滿城爭種花
治地惟種藥栽培親荷鍾購買屢傾
橐縱橫百餘區所識恨不博身病尚未
攻何論療民瘼

登封龐國博

元常字懋德

年三十八自云欲弃官隱

嵩山作吏隱庵於縣寺俾光賦詩勉率
塞命懋德負長才金牛不足割纔為百
里牢驥足殊未展齒髮方盛彊趣尚已
高遠結庵職二室志欲巢絕巘賢人

心如雲無迹有舒卷不須驚俗目卓犖乃求顯既知吏
可隱何必遺軒冕

暮春同劉伯壽史誠之飲宋叔達園

絮狂飛作團梅小不多酸共惜春餘好更窮今日歡清
流入花底翠嶺出林端嫩筍玉紫筍新櫻珠照盤歡迎
嘉客易會合故人難寄語門前僕驂騑任解鞍

用前韻再呈

舊友今餘幾追思鼻可酸休論身外事且盡目前歡薜

荔垂隄面醪醕擁席端舞精抽繭緒絃妙落珠盤醇酒
回春易靈丹却老難扶歸不復記酩酊上金鞍

示道人

天覆地載如洪鑪萬物死生同一塗其中松柏與龜鶴
得年稍久終摧枯借令真有蓬萊山未免亦居天地間
君不見太上老君頭似雪世人浪說駐童顏

謝王君貺中秋見招不及赴

不侍庾公宴月華虛四秋幸逢東閣開又阻西園遊清

輝散廣坐孤影隨行輶衮衣如未歸志願終可酬

久雨效樂天體

雨多雖可厭氣涼還可喜欲語口慵開無眠身懶起一榻有餘寬一飯有餘美想彼廟堂人正應憂燮理

聞范景仁遷居許昌為詩寄之

天衢名利場塵泥繼朝昏沉茲辭榮久厭苦車馬喧慨然忽高舉翩若黃鵠翻朝賣西城宅暮理南行轅回首豈無懷眷眷望國門想象解裝初完美未可論縱橫置

老屋缺剝周短垣臧獲念去故炊爨假甕盆幼穉喜就
新階庭走諸孫幸有克家子生事不日溫許昌昔名都
於今亦雄藩先賢雖已遠風迹凜猶存况復多巨公分
義素所敦丞相辭黃閣學士乘朱轡青雲同禁省白首
會山樊溟水湛寒光盡眼清心魂華堂臨曲渚畫舫承
芳樽高談金石諧逸筆風雨奔得朋誠多歡孤陋未可
諛時當惠好音獨樂慰荒園

送張伯常同年移居郢州

楚江白逶迤楚山碧參差玉炊稻粒長縷切魚腴肥羹
君盡室行飄然無所羈伐竹營茅茨種橘為藩籬荒坡
無四垣但以荷塘圍官雖朝大夫身世已相遺野老坐
爭席林叟談忘歸猶嫌沮溺徒名字為人知

南園飲罷留宿詰朝呈鮮于子駿范堯夫樊叟
兄弟

園僻青春深衣寒積雨闌中宵酒力散卧對滿窻月旁
觀萬象寂遠聽羣動絕只疑玉壺冰未足比明潔

自用前韻

耿耿寐不成迢迢夜未闌良朋悔不留負此當軒月懷
想空鬱陶眺聽轉清絕佗時重見過餘樽猶可潔

不寐

思夢久不效良夜行已闌此心如杯水擾易澄苦難百
年能幾何萬慮誰能殫弃置勿復尋專取形神安

招鮮于子駿范堯夫

虛牖延朝光高林散晴靄深夏猶清和閑齋亦爽瑱離

羣纔宿昔跂佇心已痂
楸枰頗光潔置設儼相待
軒車能竭來雞黍足充餒

和家兄喜晴用王安之韻

象龍雖得請躍蜥亦須占
既有膏苗益寧無漂麥嫌
餘霏方映戶反照忽通簾
羈旅愁懷闕農家喜色添
田間拾穗滿陌上荷鋤兼
豫想三川迥秋場萬庾尖

病中鮮于子駿見招不往兼呈楚正叔范堯夫

時正叔約
次日為會

衰朽拙自將蘊積成中病掩扉卧小榻安養惟便靜遙
知良友集鬱若荀陳盛獻醕屏浮飾簡率任真性雖無
束帶苦實憚把酒併開囊檢藥物不與樽壘稱筋骸幸
復常佗時掃三徑

和鮮于子駿秋意

好風自遠來小雨初濡地雖當朱夏半已有清秋意新
蟬乍孤吟病葉或先墜頓覺愈沉痾暫喜濯炎熾彩筆
動高興瑤徽發幽思賤子獨何為宵涼甘熟寐

龍門

石樓臨晴空南眺出千里人憐山氣佳予歎禹功美想
彼未鑿時極目皆洪水誰知耕桑民幸免魴與鯉

坐中呈鮮于子駿范堯夫

六言

微雨雖妨行樂薄寒却解留花今日且遊小圃明朝更
向誰家

和范景仁緱氏別後見寄求決樂議雖用其韻
而不依次蓋以景仁才力高逸步驟絕羣非

駑拙所能追故也

至樂存要眇失易求之難昔從周道衰疇人曠其官聲
律久無師文字多缺漫仁皇閔崩壞廣庭集危冠紛紜
鬬筆舌異論誰能殫或欲徇陳迹竅厚潛鏖剗或欲立
私意妄取舊史刊古今互齟齬大抵皆欺譎景仁信其
說墨守不可干賤子欲面從誰與換膽肝必求此議決
深谷為崇巖何如兩置之試就中和看天地育萬物生
成適暄寒聖人保四海皇極致阜安樂理亦如此炳煥

猶朱丹曄緩與噍殺折衷遺兩端茲道苟不由芒屨難
嬰髀魯樂最為備雍徹施三桓齊韶猶肄習太公避陳
完唐民聽伴侶不復含悲酸乃知樂有源鐘鼓皆波瀾
昨者清明初榆火始改鑪景仁從許來傾都咸聚觀諸
公競邀迓非獨惜春殘議樂不復對晝夕且窮歡來時
桃李穠去日芍藥闌三旬只須臾駛若阪上九轅轅逢
雨別惆悵歸騎單東西步步遠回首祝加餐仍冀勉中
和心廣體自胖

和韓東國招范景仁飲景仁不至云方作書與

光論樂

小桃佳李實如拳西湖盡眼鋪芳蓮景仁不從鄉賢飲
為此樂論方窮研周衰官失疇人散鍾律要眇誰能傳
近人欺衆出私意最可閔笑房生顛如光初不辨宮羽是
非得失安敢專每煩教諭累百紙頑如鐵石不可鑄王
李阮胡相詆毀各執所學何妨偏景仁家居鑄黼斛欲
除民瘼恐未然要須中和育萬物始見大樂之功全

同鮮于子駿題和樂亭

春禽弄晴朝秋蟲吟雨夕風和振蘭芳露寒滋菊色萬
物苟得所隨時各有適矧伊人最靈胡為長戚戚聖人
垂大訓燦爛著方冊至樂和無聲大禮簡無跡心專守
中庸身不蹈邪僻造次常在前須臾不離側窮通雖百
變何往不自得茲亭聊寓名和樂在骨髓

王君貺宣徽垂示嵩山祈雪詩十章合為一篇
以醺之

今秋少雨冬不雪麥寄浮埃根欲絕聖主焦心閔萬民
負宸不怡常膳撤詔書朝下徧九州岳瀆百神俱禱求
西都留守虔君命促駕不敢須臾留嵩高萬仞蟠地中
海內衆山無與雄前驅大旆擁千騎波騰雲涌來祠宮
牲肥酒香籩豆潔盛服齋明薦毛血有司執事皆肅然
寶帳神來風窳屑公心猶畏九閭遙丹誠不得通青霄
分留藁從屯林麓別張醺具登山椒山椒迢遞峻無極
行挽枯藤躡危石萬室嗷嗷愁死饑敢憚劬勞愛餘力

天門上出俄坦平下視一世塵杳冥焚香拜手傾懇惻
左右前後皆列星公今三守三川地咫尺高高未嘗至
詰朝既畢祠事嚴暫轉鳴珂歷諸寺少林昔為達磨居
達磨英靈今有無廋辭流散滿天下競以兩手捫空虛
法王魏氏離宮舊玉刻後貌鄉猶有子孫宗廟皆塵灰
止見伽藍存不朽會善庭隅千歲松一根二股凌寒空
勢如鼎足爭秀出泠泠永夜吟霜風少室先生樂閑暇
棄官來家玉峯下昔為浪泊據鞍人今結東陵賣瓜舍

溪上有堂名掛冠四垣重複皆林巒呼兒掃地喜公到
隨分絃歌留盡歡周王太子名聞久相傳羽化縹山首
鶴飛笙遠宵無迹遺廟今人空漉酒公來本不事遨嬉
周流閭里詢疲羸親呼令長囑赤子勿貪榮利窮鞭笞
境中羣望無不走回轡仍過鑿龍口奉先暮投林日曛
浥澗晨征轍冰厚歸來新詩盈一編明珠大貝相屬聯
此行雖不從公後厯厯勝遊皆目前

酬吳仲庶龍圖終南山詩

泰山魯所瞻終南乃秦望西侵井絡濶北壓鶉野曠條
梅韞名材金玉富珍藏飄風何烈烈萬物盡搖蕩屹立
不傾倚勢與厚坤壯有如牧伯賢斯民蒙保障雪霜舉
世寒千里獨重續病夫伏閭里非能事微尚顧無孤高
實藻飾安可強景行雖不忘詎敢承嘉貺

酬永樂劉祕校庚四洞詩

貧居苦湫隘無術逃炎曦穿地作幽室頗與朱夏宜寬
者容一席狹者分三支芳草植中唐嘉卉周四垂詎堪

接賓宴適足供兒嬉自問安取法前脩果慕誰非如太古民營窟避寒威又非學射人空石專致思又非沮漆俗陶復習西夷又非楚司馬金奏相賓儀又非鄭伯有壑谷甘糟醢又非越王子丹穴免憂危又非張巨和崇巖立師資所慕於陵子欲效蚓所為微竅足蔽身槁壤足充饑養生既無憾此外安敢知唯祈膏澤布歌嘯樂餘滋豈羞泥塗賤甘受高明嗤何言清尚士善頌形聲詩困剥固未嘗井復敢終辭

傳家集卷四

欽定四庫全書薈要卷一萬四千六百十三

集部

傳家集卷五

宋 司馬光 撰

古詩四

瞻彼南山詩

瞻彼南山有栌有棠維葉牂牂君子之燕籩豆洋洋
俎將將百羞阜昌上下樂康邦家之光君子萬年撫有
四荒受祿無疆瞻彼南山有楮有栩維葉湑湑君子之
燕清酒有蕓壺樽有楚酌言賜之命之醕之上下以序

君子萬年永綏兆民受天之祐瞻彼南山有杞有樅維

葉逢逢君子之燕管絲雍雍奏鼓鼗鼗自堂徂庭上下

肅雍靡有不恭君子萬年令德高明高明有融赫赫明

明天命有嚴命我祖考九土是監倭馭之東蠻蠻之南

享獻允時靡敢不詹閔茲餘文複閣巖巖萬世是承四

方是瞻帝曰卿士左右之臣四方無虞矜爾之勤式觀

且遊從予一人于壺于閔于堂于陳金石之符翰墨之

珍匪予汝夸祖考之勲多士庶尹羣公百辟拜手稽首

答揚休德既醉既飽慎思爾職罔顧爾私罔愛爾力惇
忠祇敕永奉丕則立民之極載祀千億

杕柏寄傅欽之

彼杕者柏生于崇巒其葉九九君子爰處爰處爰遊匪
憂勿憂其樂休休彼郁者蘭生于幽涯其葉菲菲君子
爰處爰處爰嬉靡適弗宜忘其渴饑洋洋者舟汎彼中
流于渚于洲思其可思知其可知其逝勿追其來勿期

園櫻

園櫻傷老也

園有繁櫻圃有肥菁我酒既清我殽既馨我友戾止聊以娛情今我不樂日月其征

園有穠李圃有肥杞我酒既旨我殽既美我友戾止改憂為喜今我不樂年其有幾

園有弱柳圃有肥韭我酒既有我殽既阜載笑載歌以宴我友今我不樂年其無久

悠悠汎舟載縱載橫白日將傾飄風載驚嗟我老矣髮

脫齒零胡為百憂勞此餘生

戲下歌

項王初破函關兵氣壓山河風火明旌旗金鼓四十萬
夜泊鴻門期曉戰關東席卷五諸侯沛公君臣相視愁
幸因項伯謝前過進謁不敢須臾留椎牛高會召諸將
寶劍泠泠舞席上咸陽灰燼義帝遷分裂九州如指掌
功高意滿思東歸韓生受誅不復疑區區蜀漢遷謫地
縱使倒戈何足為

海仙歌

東望海波蒼茫浩渺無所極高浪洪濤黯風色翻星倒
漢天地黑陰靈出沒互相索東方曛曛景氣清慶雲合
沓吐赤精蓬萊瀛洲杳如萍遥觀五樓十二城羣仙劒
佩朝玉京祥風縹渺鈞天聲彩幢翠盖煙霞生鸞歌鳳
舞入帝鄉紫麟徐驅白鶴翔餐芝茹朮飲玉漿千年萬
年樂未央

孟嘗君歌

君不見薛公在齊當路時三千豪士相追隨
邑封萬戶無自入椎牛醢酒不為貴門下紛紛如市人
鷄鳴狗盜亦同塵一朝失勢賓客落唯有馮驩西入秦

燕臺歌

萬古蒼茫空盛衰燕臺賢客姓名誰
君看碣石宮中草寧似昭王擁篲時
黃金散盡餘基沒易水蕭條烽火飛
吳沖卿直舍閤士安畫墨竹歌

閤生畫竹舊所聞望中一見遙可分
伊予不甚曉佳畫

猶愛氣骨高出羣狂枝怒葉凌絹素勢若飛動爭紛紜
蟠根數節出地底上有積年蒼蘚紋森然直榦忽孤聳
意恐出屋排浮雲秋風颯颯生左右耳目灑落遺塵氛
乃知良工自神解昧者倣習徒艱勤子猷昔者得收玩
不患終朝無此君

送伊闕王大夫歌

于嗟古之道邈既遠兮日陵夷而就衰羣儒角逐異端
競進兮聖塗榛枳幽昧而難知君獨耻從衆人之後兮

軒然高舉遠取而窮追撥去虹蜺汎掃氛濁兮廓然迺
得睹夫朝曦授邑於雒之南兮始者既學今得而施歸
風俗於醇厚兮又何西門卓魯之足為消奸化桀折牙
杜蘅兮寂不知其所之何者為令之德兮黃童皓首接
手而遊嬉菽粟露積牛羊被埜兮百里獨比於太古之
時予願解冠棄佩兮受一廛於伊之埜蓑身笠首兮同
邑民以熙熙

和錢君倚日本刀歌

昆吾道遠不復通世傳切玉誰能窮寶刀近出日本國
越賈得之滄海東魚皮裝貼香木鞘黃白間雜鑰與銅
賈人云真鑰似金真銅似銀百金傳入好事手佩服可以攘祿凶傳

聞其國居大島土壤沃饒風俗好其先徐福詐秦民采
藥淹留童叟老百工五種與之俱至今器用皆精巧前
朝貢獻屢往來士人往往工辭藻徐福行時書未焚逸
書百篇今尚存令嚴不許傳中國舉世無人識古文嗟
予乘桴欲往學滄波浩蕩無通津令人感嘆坐流涕鏞

澁短刀何足云

風林石歌

蔡著作抗字子直
得此石於朱陽山

聞君家有風林石鐫刻無痕畫無迹靡然合勢俱左傾
偃蹇常如負風力置之坐側野意生靜聽若有颼颼聲
忽疑身世在丘壑使我蕭然無俗情黃金白璧豈非好
子直視之不為寶

天馬歌

大宛汗血古共知青海龍種骨更奇
綢絲舊畫昔嘗見

不意人間今見之銀鞍玉鐙黃金轡廣路長鳴增意氣
富平公子韓王孫求買傾家不知貴芙蓉高闕北向開
金印紫綬從天來路人回首無所見流風瞥過驚浮埃
如何棄置歸卓棧蹠足垂頭困羈絆精神慘澹筋骨羸
舉目雙精猶璀璨伏波馬式今已無子阿肉腐骨久枯
舉世無人相騏驥憔悴不與駑駘殊神兵淬礪精芒在
寶鑑遊塵肯終晦君今鬢別被鳴鸞尚能騰踏崑崙外

苦寒行

窮冬北上太行嶺，霰雪糾結風崢嶸。
熊潛豹伏飛鳥絕，一逕僅可通人行。
僮饑馬羸石磴滑，戰慄流汗皆成冰。
妻愁兒號強相逐，萬險歷盡方到并。
并州從來號慘烈，今日乃信非虛名。
陰煙苦霧朝不散，旭日不復能精明。
跨鞍纜轡趨上府，髮拳鬚磔指欲零。
炭爐炙硯湯涉筆，重複畫字終難成。
誰言醇醪能獨立，壺腹迸裂無由傾。
石脂裝火近不熱，蓬勃氣入頭顱腥。
仰慙鴻雁得自適，隨陽南去何溟溟。
又慙鳬鳥識時節，巖穴足以潛微。

形我來蓋欲報恩分契闊非徇利與榮古人有為知己
死只恐凍骨埋邊庭中朝故人豈念我重裘厚履飄華
纓傳聞此北更寒極不知彼民何以生

楚宮行

楚王宮中夜未央清歌祕舞會華堂木蘭為柱桂為梁
隨珠和璧爛同光橫吹乍鳴秋竹裂繁絃初度春雨歇
九微火樹垂垂滅羅衣紛紛玉纓絕滿朝冠劔東方明
宮門未啓君朝醒秦關日夜出奇兵武安君火照夷陵

洛陽少年行

銅駝陌上桃花紅洛陽無處無春風青絲結尾連錢驄
相從射獵北邙東流鞭縱鐔未云畢青山團團載紅日
雲分電散無影迹黃雞未鳴已復出

將軍行

赤光滿面脣激朱虬鬚虎額三十餘腰垂金印結紫綬
諸將不敢過庭除羽林精卒二十萬注聽鉦鼓觀麾旗
肥牛百頭酒萬石爛漫一日供歡娛自言不喜讀兵法智

略何必求孫吳賀蘭山前烽火滿誰令小虜驕慢延須
吏

緱山引

王子吹笙去不還當時舊物唯緱山山深樹老藏遺廟
春月秋風空自閑轆轤左界連商雒碧瓦朱欄露華薄
經時掩戶庭草深永晝無人澗花落徘徊未下日將西
遙望嵩陽煙景微鶴馭飄飄向何許林間空見白雲飛

烏栖曲二首

風透金鋪結綺錢穿簾入幌舞垂蓮可憐無人夜不曉
起視西窻月華皎

星踈月明漏水長羅帷翠帳華燈光佳人起舞玉釵墮
門外烏栖鴈南過

和王介甫明妃曲

胡雛上馬唱胡歌錦車已駕白橐駝明妃揮淚辭漢主
漢主傷心知奈何宮門銅環雙獸面回首何時復來見
自嗟不若住巫山布袖蒿簪嫁鄉縣萬里寒沙草木稀

居延塞外使人歸舊來相識更無物只有雲邊秋鴈飛
愁坐泠泠調四絃曲終掩面向胡天侍兒不解漢家語
指下哀聲猶可傳傳徧胡人到中土萬一佗年流樂府
妾身生死知不歸妾意終期寤人主目前美醜良易知
咫尺掖庭猶可欺君不見白頭蕭太傅被讒仰藥更無
疑

憫獄謠

五刑象天有震耀上聖本以防姦邪法官由來少和泰

臯陶之面如削瓜況於秦漢任酷吏死人籍籍如亂麻
捶楚之求靡不得小者劓刖大滅家君不見古時牢獄
地幾多冤骨埋黃沙

宮漏謠

宮漏清高處處聞六街寂寂夜將分南下河梁緬詰曲
北瞻禁闕鬱繽紛黃金鎖閉斗城斜白玉樓通上帝家
若木未光潛日月神仙不動積煙霞銅壺銀箭夜何長
杳杳亭亭未遽央複道迴廊接西掖千門萬戶遙相當

宛轉徘徊不能駐復出宮城透宮樹宮樹烏飛月欲西
燭光一道照沙隄龍騎聯翩擁闔闔鳳帷岑寂對後貌
廣庭肅肅延冠帶劒佩崢嶸百神會施政發令四海春
廟堂垂衣天寓泰

窮兔謠二首

鵲翅崩騰來九霄兔命迫窄無所逃秋毫就死忽背躍
鵲拳不中還飛高安知韓盧復在後力屈但作嬰兒號
少年只取一快樂誰念草根腥血毛

兔營三窟定何在棘間塹底高丘巔却行百步方躍入
未免餘蹤留雪田少年何為無惻隱解鷹縱犬薰以煙
人言兔狡非兔狡窘急偷生真可憐

張子厚先生哀辭

名載

先生負材氣弱冠遊窮邊麻衣揖鉅公決策期萬全謂
言叛羌背坐可執而鞭意趣小參差萬金莫留連中年
更折節六籍事精研義農訖周孔上下皆貫穿造次循
繩墨儒行無少愆師道久廢闕模範幾無傳先生力振

起不絕尚聯綿教人學雖博要以禮為先庶幾百世後
復覩三王前釋老比尤熾羣倫將蕩然先生論性命指
示令知天聲光動京師名卿爭薦延寘之石渠閣豈徒
脩簡編丞相正自用立有榮枯權先生不可屈去之歸
卧堅孤嫠聚滿室餬口耕無田欣欣如藜藿皆不思肥
鮮近應詔書起尋取病告旋舊廬不能到丹旄風翩翩
人生會歸盡但問愚與賢借令陽虎壽詎足驕顏淵况
於朱紫貴飄忽如雲煙豈若有清名高出太白巔門人

俱經帶雪涕會松旰厚終信為美繼志仍須專讀經守
舊學勿為利祿遷好禮效古人勿為時俗牽修內勿修
外執中勿執偏當令洙泗風郁郁滿秦川先生儻有知
無憾歸重泉

景福殿東廂詩

皇祐元年作

皇祐元年秋八月皇帝臨策賢良方正及武舉進士僕
與范景仁受詔簪言校策卷寓直於景福殿東廂凡三日
得詩十三首編之左方

夜意

清夜四無譁深巖上帝家星翻珠網白斗挂玉樓斜風
靜虛成韻霜輕未作花還疑漢津客浩蕩寄流槎

即日

杓指留深殿倉琅祕九門日長人對直風迴鷺高翻林
有蕭疎意雲無片縷痕釣天真自到不獨暫飛魂

柏

落落抱高節秀出青雲端無言磻谷幽自致宮庭難芳

風襲玉宇餘露分銅槃不使萬年木嘉名高歲寒

御溝

萬戶鬱相鉤枝分瑟瑟流縈紆通桂觀隱見帶龍樓碧
映千林曙紅飄一葉秋寒波長不竭歲歲奉宸遊

賜酒

和氣盈金盞恩光湛玉觴應知北山羽猶怯上林霜醇
味回秋色清都近醉鄉山茅霑雨露誓極寸心長

菊

瑣瑣南陽菊秋潭歲自開孤根擁紅葉落葉媚蒼苔正
以參靈藥因之植紫臺願兼金掌露同入柏梁杯

賜果

南海荔支來別館蒲萄成匪頒浹下陳捧拜同驩榮置
忝敢先食臨槃多未名懷核待歸種復愁千歲生

賜書

上聖固天縱英藝皆絕倫時乘萬幾閑翰動如有神用
之當豫遊不忘安四民匪頒及羣下絡繹來中宸韞琬

靈鳳翔鬱怒虬龍振清若四海秋熙如天下春愚臣土
芥微亦受雨露均願推賜書意直以古義陳士本學先
王所求誼與仁農當服稼穡昏作畎畝勤百工備用器
不治刺繡文萬商遷有無不通珠翠珍四業既交脩坐
令風化純人和衣食豐天應殊祥臻皇心正在此非以
能高人

怪石

昔去江湖鄉來與松桂接圭角老龍脊鋒稜秋劒鋏厯

亂枯苔點交橫敗莎葉會使成都人更取神著撰

未開木芙蓉

木末采芙蓉騷人歌所無何言霜花艷不與水芝殊香
苞麝臍結茂葉桐陰敷豈若龜巢類飄零老五湖

讀武士策

漢家求猛士雲集未央宮天外胡星淡山西將種空奇
謀紛並進壯節凜生風八陣縱橫勢依然見目中

觀試騎射

閭闔風正清飀稜日初媚材雄集便殿玉座親臨視三
河俠少兒初識天子貴天山汗血騶蹀躞金鑲轡揚鞭
秋雲高顧盼有餘銳縈回勢可觀罄控動如志毫釐應
心目審固參身臂鳴絃電電驚寸的冰瓦碎龍顏薄笑
春喜色連傍侍旦為徒步人暮作影纓使揚揚出九門
親友生意氣須知天地德慎勿忘所自黠羌猶旅拒獫
狁方繁熾求為忠義臣無負搜羅意

同范景仁寄修書諸同舍

烈火非不猛不耗百鍊金寒霜非不嚴不彫竹柏林小
人勢利合傾覆無常心君子道德親白首猶視今諸君
閨臺秀相得如璆琳離羣一昔期乃爾動悲吟古風久
已衰交道日頽侵願名思友操播之清徽琴

和聶之美諷古

曲逆從漢祖出奇誰與讓一朝寄天下不及王陵戇
海客久藏機鷗知人未知如何毫末利管鮑亦相欺

和之美二貧詩

君子尚仁義實用為身資其人苟不賢富饒亦胡為所
以回憲徒不厭糠與藜當時萬金產令名傳者誰之美
初解褐為吏長河湄月得數斗祿僅足供饘糜謂言家
無寶不必脩藩籬囊衣不自暖乃為偷意窺穿墉入其
室探取無纖遺從事借之帶同列乞其衣日高服未具
不敢踰門畿蕭條四壁寒獨立空自嗤援毫引幅紙書
作二貧詩上言運命邅邅溫飫無時期下嗟職事勞舊學
日以墮乃知賢者心不獨憂寒饑墮坎雖益多志業終

無衰我實甚貧者視君猶白圭行年三十餘碌碌無佗
奇庇身太學官旦夕唯鹽齏讀君二貧作我事借君詞
君誠士林秀不免青衫卑滿腹豈無才抱蓄未有施不
用固為小用之活蒸黎如君有此富豈必藏珠璣財貧
非道貧已矣何嗟咨

送薯預苗與興宗

客從魏都來貽我山諸實散之膏土間春苗比如櫛吾
家庭戶狹樹藝苦其密危根遞扶戴怒牙猶怫鬱興言

念伊人好嗜與我一家蓄桐君書喜觀汜氏述雖為簪
帶拘雅尚林樊逸分獻取其誠豈容羞薄物况聞知藥
者餌此等苓朮願益君子年康直體無疾散誕得寬壤
繁大宜無日蕭梢新蔓抽芊萼故叢失入冬霜霰嚴葉
落掊可出伸如猿臂長拳若熊蹯脂拾木爨銅鼎相期
聚書室誰得與其徒谿茶與山栗

答昌言求薯預苗

冬實散肥壤春苗動新葉雅意非遺人野情聊自愜何

言好事者求訪來相疊會種十畝餘坐取詩盈篋

送冷金牋與興宗

蜀山瘦碧玉蜀土膏黃金寒谿漱其間演漾清且深工
人剪穉麻擣之白石砧就溪漚為紙瑩若裁瓊琳風日
常清和小無塵滓侵時逐賈舟來萬里巴江潯王城壓
汴流英俊萃如林雄文溢箱篋爭買傾竒琛夫君乃冠
冕辭氣高千尋十載為舉首於今猶陸沉嗟我蓄此紙
才藻不足任願以寫君詩益為人所欽縞帶豈多物足

明同好心黃鍾聲如雷豈病無知音請以此為質佗年
神所臨華軒策駟馬慎勿忘遺簪

和端式十題

春塘水

春塘含薄冰淅瀝隱隈曲晴日射寒芒柔風折哀玉草
樹曾未知波光已先綠

煙際鐘

蒼茫迢迢照收幕厯寒煙起前山黯同色不辨峯巒美獨

有遠來鐘悠揚翠微裏

汀洲蘋

秋江

缺一字

澹蕩波急枝難定參差碧葉繁皎潔寒花靜

幽人吟不歸獨立汀洲暝

漁洲火

漁翁繫葉舟遠映楓林宿手携雙白魚呼兒繫山竹深夜寂無人明滅寒江曲

寒溪石

穹石正嶄岩寒流更清急霜飛敗葉擁波濺蒼苔濕谿
僧勿劇來沙鶴方孤立

幽谷泉

深谷窅無底空聞泉水哀時因秋日照微見碧縈回谷
裏非人境胡麻何處來

秋原菊

高原向搖落叢菊始滋榮草際浮金碧照人雙目明何
須天生理玉斚泛餘英

垂崖鞭

山竹引春根垂透蒼崖底綢直老龍鬚
關 估修蛇尾支
郎雖畜馬不忍裁為箠

木陰

古木夏陰薄蕭蕭蠹葉微豈無綠樹濃愛此風煙姿高
僧此休息肩奇瘦筇枝

天外峯

飛鳥去不息長空黯何極疎峯帶夕暉點綴秋天碧禪

觀坐超然相望兩沈寂

和聶之美雞澤官舍詩七首

西齋

明府學既優所聞今得施四境已澄清還以書自怡西齋幾黃卷治原俱在茲

題廳壁

百里有民社古為子男國苟有愛物心穉老皆蒙德為身不為人鄙哉陶彭澤

縣樓

孤樓雖不高足以瞰四遠
餉婦陌頭歸田夫桑蔭飯
吏省追胥勿令農事晚

葦

索索夕風道瀼瀼朝露裊
啁雀裊寒枝宿螢依敗葉
眇然秋興長坐與江潮接

柳

驛道苦車馬田廬悲斧斤
誰栽官舍前老朽完天真
所

願明府心底樹如底人

向城路

村路煙欲暝行人殊未稀
借問往來者營營皆有為
乃知市朝客趣務良可悲

懷翠亭

高齋對秋山平望殊不遠
雖違獨徃心蒼蒼長在眼
可嗟都邑遊終日紅塵滿

超然臺詩寄子瞻學士

使君仁智心濟以忠義膽嬰兒手自撫猛虎鬚可攬出
牧為龔黃廷議乃陵黠萬鍾何所加甌石何所減用此
始優游當官免阿諂鄉時守高密民安吏手斂乘閑為
小臺節物得周覽容膝常有餘縱目皆不掩山川遠布
張花卉近綴點筵賓殺核旅燕居兵衛儼比之在陋巷
為樂亦何歟可笑夸者愚中天猶慘慘

今古路行

出門道路多縱橫不我測我今欲遠行須問曾行客徐

徐逢路人客問青松側客曰君何往答曰遊京邑客乃
指要路而言行有益古路雖大道不如今路直但行今
人路猶如假羽翼彼客別我去獨自踟躕立為見今古
路無乃須差忒今路足輪蹄古路饒荆棘欲行今人路
恐背古人迹擬行古人路今人笑迂僻又擬不出門奈
有饑寒逼哀哀於此情悠悠蒼天色不避今人嫌路須
行古陌古陌雖然遠且保無蹶失勉哉自勉哉前古難
知識不復見楊朱萬古凝愁魄

憶同尋上陽故宮路

上陽門外雲連草車馬遙遙往來道昔王遊豫幾何年
今人豈識當時好明珠翠羽已成塵道上行人幾番老
當時秋天落宮槐今此婆娑皆合抱

秋意呈鄰幾冲卿


新涼入閭巷舊暑何人掃筠籠賣紅蓮莎堦墜丹棗蕉
衫日以疎紈扇安能好蟬悲西風樹燕亂斜陽草此意
屬淵明籬邊幾樽倒

傳家集卷五

謹案卷四第四頁後六行離縱出短蒲刊本離縱
訛離縱今改

第十四頁前二行闕空媧切刊本媧訛娼今據韻
會改

卷五第五頁前四行寂不知其所之刊本之訛知
今改



總校官庶吉士臣侍朝

校對官庶吉士臣陳文樞

校對官編修臣朱攸

謄錄監生臣潘沛然

謄錄監生臣劉復善